


23 Abril 2018

Komunikadu Imprensa

Presiza hadi'ak liu tan Transparénsia Timor-Leste nian



Relatóriu Inkéritu ba Orsamentu Aberta (Open Budget Survey) - OBS ba 2017 ne'ebé fó sai hosi International Budget Partnership (IBP) foin lalais ne'e hatudu hela katak nivel transparénsia Timor-Leste nian presiza

hadi'ak liu tan. Relatóriu ne'e fó sai katak Timor-Leste nia pontu iha 40 hosi nasaun 100, ne'e seidak to iha pontu media global nian mak 42. Pontu 40 ne'e sei iha nivel limitadu, no nafatin hanesan ho pontu iha OBS 2015 nian. Pontu Limitadu ne'e akontese tanba Timor-Leste la publika Relatóriu Trimestral sira tuir tempu, no mós laiha Relatóriu Annual ba despeza nian maske iha informasaun balu ne'ebé publika sai iha Portal Transparénsia Orsamentál Timor-Leste nian. Aleinde ne'e, Timor-Leste mós la prodús Deklarasaun Pre-Orsamentál no Retifikasaun tinan klaran kada anuál nian.

Iha sasukat partisipasaun públiku, Timor-Leste kontinua fó oportunidade uitoan de'it ba públiku atu participa iha prosesu orsamentál. Parlamentu Nasional nia Komisaun balu mak fó oportunidade ba audiénsia públiku hosi sociedade sivil no públiku seluk, maibé besik laiha espasu bainhira prosesu orsamentál ne'e iha parte ezeutivo.

Iha parte fiskalizaun orsamentál, jerálmente Parlamentu hala'o fiskalizaun limitadu durante síkulu orsamentu. Maske adekuaudu durante preparasaun no diskusaun, maibé fraku bainhira orsamentu ne'e implementa ona. Ba Audit nian, Tribunal das Contas hala'o nia servisu ho adekuaudu bainhira halo auditoria ba orsamentu nian, maibé prosesu audit ida ne'e la hetan revizadu hosi ajénsia independente ida.

Nune'e, atu hadi'ak nivel transparénsia, ami rekomenda katak Timor-Leste presiza publika nia Relatóriu Trimestral tuir tempu, prodús Deklarasaun Pre-Orsamentál no Retifikativu anuál kada fulan neen, hala'o audiénsia sira iha Parlamentu ho públiku no organizasaun sociedade sivil sira, estabeselese mekanizmu formal atu públiku bele asiste oinsá Tribunal das Contas hala'o auditoria, asegura atu iha debate ba polítika orsamentál molok Governu halo nia proposta orsamentál, asegura katak relatóriu audit nian hetan revizado hosi ajénsia independente no mós kria institutu fiskál independente ida atu haforsa tau matan ba orsamentu estadu.

Peskiza Inkéritu ba Orsamentu Aberta ne'e hala'o hosi:

Juvinal Dias
La'o Hamutuk
Rua Dom Alberto Ricardo, Bebora, Dili, Timor-Leste
Email: info@laohamutuk.org or juvinal@laohamutuk.org